

# لغة العاشقين

شعر

م. خليل عبدالمجيد



## لغة العاشقين

المؤلف:

خليل عبدالمجيد خليل عبدالمجيد

تنفيذ الغلاف

محمد سيد حسن

رقم الإيداع: ٢٣١٣ / ٢٠١٦

الترقيم الدولي: 8-19-5255-977-978

الطبعة الأولى: ٢٠١٦

حقوق الطبع محفوظة للناسر

سنابل للكتاب

٥ شارع صبرى أبو علم

باب اللوق - القاهرة

الإدارة:

(+202) 23 92 65 93

(+202) 01001094302

المكتبة:

(+202) 23 93 56 56

E-mail

Sanabil\_bookshop90@yahoo.com

Ahmed\_mmorgan@yahoo.com

Face: sanabil bookshop

المدير العام:

أحمد مرجان

# لغة العاشقين


شعر

م. خليل عبد المجيد



## اللاهراء

إلى النزف الدائم فى بحور حنينى  
وأناث الوجع بقلبى .... وشجونى  
وطنى ... الذى أعشقه بإدمان  
إلى أمى التى أرضعتنى الحنان  
إلى نبض الحياه فى عروقى ... حنان  
إلى أبنائى ...  
ياسمين .. نسرين .. محمد



## أحلام غريبة

احلم...واتمنى مُلكك  
أحلام الدنيا ملكك  
يمكن تلاقي سكتك..  
وأنيس يواسى غربتك  
واشغل بالحلم ليلتك  
واصحى على نفس الألم...  
كوم همومك كالهرم  
فتش ف خزان الأمانى اللى انخرم  
يا محترم...يا محترم  
روح اشتكى...  
أقول : إن قلبك انظلم  
ومين هيسمع شكوتك  
ما انتا الغريب ..ف بلاد غريبة ..  
وبتشتكى فقد الحبيبة

وانت ال قريب من قلبها وهى ال .. بعيدة  
لأ .. وال...مصيبة  
أصل المرض جواك ... ولا غيرها الطيبة  
ومين يا مسكين ... راح يواسى غربتك  
حر ... وطلق ..أيوه بصحيح  
لكن سجين .. والسجن من جواك  
ويا مين يجيلك بالأمل  
وتكون معاه حریتك  
دا السكة تاهت مننا  
والغربة مش غربة وطن  
لما بتلاقى الأمانى اتسرسبت  
ونفوس مريضة اتملكت  
وفكرة خبيثة ... للنفوس الطيبة اتسربت  
وقلوب بريئة اتغربت... وناس قريبة بعدت  
وحاجات كثير اتشعبت...!!!!!!  
وبقينا شتى م الشتات  
وماعدشى لينا إلا الفتات

ووجعنا ينباع للسكات  
متقولشى أي حد الممات  
وتزيد آلامك... غربتك  
مسكين حزين...  
بتلف حوالين السنين  
عاوز تلاقى جنتك  
الدنيا مش جنة !!!  
جايز تكون... الدنيا سكة لجنتك  
اسمع وشوف...  
واحلم بعين تعرف تشوف  
كل الخطوط بين الكفوف  
وايه اللي مخطوط ع الجبين  
عبر السنين مستنين  
واقفين صفوف... والناس صنوف  
مسكين أكيد... عايش وحيد  
وف وسط كل الخلق حاسس غربتك  
لون ليالى الغربة.... اصنع بهجتك

تقل على كل الكلام  
اللى انكتب بقلم رصاص  
إثبت وجودك بالعلام  
واعرف بقى إنه خلاص...  
مفيهاش خلاص  
دا الغربية جوانا ....  
الغربة مش غربة مكان  
لو كان قريب لو كان بعيد  
وه اقول وازيد  
الغربة لما تكون وحيد  
وحتى لو كنت الملك  
وكل اللى حوالينك عبيد  
حواليك كاسات العز  
مصنوعة بذهب  
وصولجان الملك  
اللى من زمن اتوهب  
حكمة وليد بن المغيرة

وعزوة كانت لأبو لهب  
والمال كمان...  
نازل عليك من غير سبب  
ولا مر يوم وتشوف عنيك  
ف القاموس كلمة تعب  
عاوز تكون فعلا سعيد  
نفسك تنول هذا اللقب ؟  
محسود على الغربية..  
ولآع اللي كان انكتب  
وسط الجميع  
ومين هيفهم غربتك  
موجود ولكن...  
مفقود ف لمة صحبتك  
حاسس أكيد لكن عنيد  
فعلا غريبة قصتك ... !!!  
يا سنين قوليلي ع اللي كان  
يا سنين تعبت بقى حرام

وتعب كمان منى الكلام  
ومعاشى فيها يا ناس رجوع  
والكلمة تطلع ك السهام  
شايلة الوجع ملفوف على نبرة خضوع  
تنشد على عزف الكمان  
ونيات مع صوت النحيب ...  
فين الحبيب ؟؟؟؟  
لها حق تنهمر الدموع  
بالليل تبان... تسقى الآلام  
تشهد عليها مخدتك  
ومع الصباح... الحلم راح  
وانسى وفوق... روق ورووق  
دى الدنيا تحت (جزمتك)  
بس المهم... صحتك  
وف المسا....  
بتلاقى حلمك ابتدى  
اللى ف نهارك إتسى

ترجع وتحلم حضرتك...  
يمكن تلاقى دينتك  
متلونة بلون الندى  
وتلضم خيوطك بالحياه  
يمكن تحدد سكتك  
وتحس جواك الندا  
جاي الأمل وجايب معاه  
قلوب ما ليها محبتك



## التعلب فات

التعلب فات فات  
وف ديلة سبع لفات  
التعلب ذكى ومكار  
والتعلب خاين غدار  
التعلب عامل مسكين  
ومخبي راسه ف الطين  
التعلب عمل انه مات  
وفجاه أكل الفرخات  
التعلب عمل إنه أمين  
وادور لهف الباقيين

التعلب فات فات  
وف ديلة سبع لفات  
التعلب دا أصله ديب  
ولا عنده صاحب وحبيب

التعلب ملك الحكايات  
ودا غاوى أكل الغنمات  
التعلب عامل إنه أمين  
ورا ضهروا ماسك سكين  
بيسلم بإيده اليمين  
وبالتانية نازل طعنات  
التعلب فات فات  
وف ديله سبع لفات

## متاهة

أربع دواير .. بس حاير ....  
عینی شایفه ترس دایر  
حاجه داخله جوا حاجه  
وحاجه بتقول ألف حاجه  
مش طیا به و مش سذاجه  
وامتی راح تظهر بشایر  
وف المتاهه الكل دایر  
ومین لمین یقدر یعاير  
وفلوس بتتعی ف شکایر  
وناس آهه ساکنه ف مقابر  
وناس بتعلی بالعمایر  
وناس فلوسها دخان و طایر  
وناس وشوش من غیر ضمایر  
وناس تدوس فوق الحرایر  
وناس ف خیشها عاشت مصایر

وتوهه تايهه جوا الدواير  
لا حد قاعد ولا حد ساير  
ويا خوفى نلبس فيها الأساور  
لا ليها مخرج و لا ليها كاسر  
وطوقها طابق لحد الزراير

## عابر سبيل

\* أول كلامي ناديت يا ليل  
لو كان صحيح بدري اكتمل  
ليه الحبيب سافر ماجاش  
وازاي باشوف الناس طشاش  
وصبحت ميت .. و التعب هو اللي عاش  
أول كلامي ناديت يا نيل  
أنا م البلد دي مش دخيل  
والبال طويل ... و الباع طويل  
وإن جرحي طاب هقدر اشيل  
بس اللي عاوز تعرفوه  
لو ينشطب اسمي اكتبوه

(عابر سبيل)

\*\*\*\*

\* أول كلامي ناديت يا ليل

ه اعبّر جبال الصعب

فوق خيال المستحيل

و اقول يا نيل.....

أنا جيت اوفي العهد

أنا منك يا نيل

وصرخة جوا الليل ف قلب الصمت

اللي اكتمل مش بدرنا

اللي اكتمل بدر العدا....

و معادش غير صوت وصدا

و كلام.....

و بقيت خيال وانا كنت أشيل حملين جمل

يا ناس ياهوووووه...

صوت استغاثة اسمعوه

وانا.....(عابر سبيل)

\*\*\*\*

\* ياسكتي المفروشة بالشوك والأمل

لو كان صحيح بدري اكتمل

ليه الحبيب سافر ماجاش

والرؤية تاهت..

والأمل روح و تاه...

والناس طنناش...

والدموع نزلت .. دويت الرموش

والوش ده فيوم كان بشوش

يضحك طوب الأرض....

والضحكة تجرى ألف ميل

حتي لو كل البشر ما بيضحكوش

واللي اختشو ماتوا...

واللي عاشوا ما يختشوش

ما تزعلوش....

لو كان كلامي تكرهوه

م الشريط ابقوا امسحوه

وانا ... (عابر سبيل)

\*\*\*\*

\* أول كلامي ناديت يا نيل

ناديت ياعين من غير ياليل

أنا م البلد دي مش دخيل

ليه الشعوب تبكي الديار

هوا ليلنا ملوش نهار

دا البال طويل... و الباع طويل

وان جرحي طاب هقدر أشيل

بس اللي عاوز تعرفوه

لو تنفصل عن جسمي راسي

ادفنوه...

و علي قبري..اسمي اكتبوه

(عابر سبيل)

## أيوه أنا... فلاح

فلاح وغازز جدري أنا ف الطين  
فلاح وزارع قصايد حب بالفدادين  
فلاح وبسقى الأرض شوق وحنين  
واغرس مبادئ الحب فين مابكون  
تطرح جنابن الخير كما البساتين  
فلاح وجامع م القلوب ملايين  
جمعت أهل العشق وقفواع الصفين  
وقولت قصيدة عتيقة نزلت دموع العين  
فلاح وبيهادى الكل بزهرة ال ياسمين  
وزارع جنابن الفل لملتقى العاشقين  
وزين البستان بأحلى الزهور نسرين  
وحارس يصون الود أصله جدع وأمين  
وجامع قلوب بالحب ف جنة الرياحين

فلاح ومتعلم وعلمى كان الصبر  
صابر على الآلام قبل السنين بسنين  
صبرت ع العيشة ماليانه هم وفقر  
ويهجم عليا العيا يكفينى منه يس  
فلاح ويهدى للخلايق فرح...  
واضحك وكلى بكا وقلبي حزين  
وانا اللى خصصلى الزمان فى كل ليلة جرح  
وابكى فى صمتى وبكايما مالوا أنين  
وانا فى بيتى البسيط كانى جوا صرح  
ملك متوج لكنى م المساكين  
فلاح وزارع أرضى بالأحلام  
أصل البساطة ف قربنا م الطين  
حالف لحارب الوهم والأوهام  
و سمعنا ياما كلام والفعل أمر مشين  
و اللعب ع الجهل كان لعبة الأفلام

ولو الحقيقة بتنطق برضوا مش شايفين  
فلاح وابدأ يومى بشق الفجر  
بين فاسى والمحرات وقتى يمر  
ولا بتفرق معايا إن كان شتا أو حر  
فلاح ودمى حامى وطبعى حر  
صامد ولحمى ف الحقيقة مر  
ومين عرفنى حقيقى شاف منى اللى يسر  
ولو الجره مخرومة على دماغه تخر  
فلاح وعاشق ضربة المحرات  
يزرع فواكه وأكله كان كرات  
يسقى جنابن الخوخ بعرقه والبركات  
تطرح نخيل الشوق أحلى بلح امهات  
فلاح وبانى م الأمانى قصور  
وكل أمله ف حياته إنه يعيش مستور  
فلاح وأجمل ما فيه بيحجر المكسور

وأحلى ما فيه القناعة كاللؤلؤ المنشور  
شمعة ونورها ينور الطريق للغير  
يزرع ويجنى ويهدى... الخير لكل الناس  
وهو كان ف الأصل... الحس والإحساس  
ع الفطره جواه طيبه.. معدن أصيل كالماس  
ولا عمره كان....  
بينه وبين ربه حجاب  
يرفع إيديه للسما  
تنفتح أبواب....

مايو ٢٠١٥

## عشان بسكت...!!!

عشان بسكت على حقى  
راحوا افتكروا إني مالي حق  
واعبى ف نفسى واخبي  
لحد خلاص ما كنت هطق  
وجالى الضعط والسكر  
ولا بنطق ولا أقول لأ  
عشان حساس ومش أكثر  
أسير الخير وقلبي أرق  
وعمرى ما كنت بتكبر  
وبتواضع لكل الخلق  
واطمئن نفسى واتصبر  
وأقول جانا النهار شقشق  
وأنا علشان ما ازعلكم  
على راسى ونازلين دق  
ويرسى زعلى على الفاضى

وكله كلام خارج م الحلق  
وأنا الجانى وأنا القاضى  
وأنا ليا وعليا الحق  
ليه المجنى عليه جانى  
وليه الظلم صار مبدأ  
على الهامش وانا راضى  
وف الدنيا دى ماشيين زق  
وبسعى يا ناس على اللقمة  
وربى اللى وهبنى الرزق  
ومحسود ليه مش عارف  
وليه يا خلق نازلين نق  
ومن همى مانيش شايف  
دا أنا قلبى خلاص انشق

\*\*\*\*

على نفسى أنا باجى  
عشان ما اكسرش خاطر حد  
أنا معرفش ليه ساكت  
لازم انطق وما فى بُد

أكيد لازم اخذ موقف  
ما هي الدنيا دي صد ورد  
أنا مش فاهم اللعبة  
أنا واخدها جد ف جد  
وحتما فيه هنا وقفه  
و ابنيكوا الجسور تنهد  
وأنا قدمت مليون سبت  
ولا لقيته مره الحد  
وياما مسحت دمعتكم  
وبدلت الدموع بالورد  
وياما قابلت قسوتكم  
وبدلت الجفا بالود  
ماطالني منكوا غير قسوه  
وشكوى وقلب يتنهد  
أنا ليه دايمأ أشحتكم  
وبسألکم وفين الرد؟  
وبرضوا لا يمكن أنساكم  
وبيکم حزنی يتبدد

ولو مات الأمل فيكم  
جائز ف ولادكوا يتجدد  
ولأنك أنت:

عشان حقت على كمان  
أدوس على نفسى واكسرها  
عشان خوفى تنام زعلان  
كل حقوقى بخسرها  
عشان خاطر ك عليا ما هان  
آلامى عمرى ما حصرها  
مسير الحق يوم هـ بيان  
ورب الكون ييسرها

مارس ٢٠١٥

## تاریخ منسی

أنا تاریخ لکن منسی  
لإن ضمیری مابینمشی  
أنا تاریخ وافکرکم !!  
ومین فیکم مایحلمشی  
أنا حرکت مشاعرکم  
ومنکم حب ولاطالشی  
أنا الذکری أنا الأيام  
أنا الأحلام.....  
أنا اللی جای سنین قدام  
أنا کونت أفکارکم  
أنا شعری اللی حررکم  
أنا صحیتکوام الأوهام  
أنا لو جیت علی بالکم

تحنُّوا لأجمل الأيام  
أنا علمت أوتاركم  
تعزف أعذب الألحان  
أنا القلب اللى شال ليكم  
وحمل م الهموم أطنان  
أنا الدمع اللى سال منكم  
أنا النشوى أنا الأشجان  
أنا الحب اللى جمعكم  
وكنت الود والتحنان  
أنا كبرت إحساسكم  
وشعلت الغرام بركان  
أنا الوهج اللى نوركم  
وصحيت فيكم الإيمان  
أنا اللى عرفت أحيركم  
واجمعكم بكل حنان

أنا إحساس جميل فيكم  
أنا تاريخ وأفكاركم  
أنا جازي أكون بينكم  
أنا جاي بالأمل ليكم  
أنا المضغه اللي جوا الجسم  
أنا و انتم بنفس الرسم  
أنا بينكم بنفس الاسم  
أنا إنسان .....

أنا تاريخ لكن منسى  
كأنى خلقت م النسيان



## إلى الكلمة...

إلى الكلمة تتلعثم فى فمى من ألم المرض

أخرجى...عبرى ...

إن شالله حتى تصرخى ....

أرجوكى لا تتأثرى ...

وانفضى ....الم السكوت ....

واوعى بحروفك يا كلمة تجرحى ...

وإبنى بدل البيت بيوت

واسرحى ... ف الحلم ...يكمل منظرى


واوعى تكونى سكينه تلمه وتدبحى ...

إحساس برىء...

وافرحى ....


دا المشاعر الصادقة جدا ...

عمر ما .. أبداً تموت!!!



## للزمن بصمات

شايقين خطوط الزمن..  
ف الوش كالعلامات  
ولا مجارى الدموع  
محفورة كالقنوات  
والعين تناجى الشموع  
وتبكي ع اللى فات  
دى خريطة متفصله  
وللزمن بصمات  
والعمر طال يا زمن  
وخلص كلامنا سكات  
ومهما نعيش ع الأرض  
بُكره يقولوا مات  
وعجيبى.....



## أنا العاشق

أنا العاشق .. وعشقى عذاب  
وقلبي علقوا بيكى أمل كذاب  
ويا المعشوقة ليه قافله...  
ف وشى الباب ؟؟؟  
وليه بتضدى أحبابك...!!!  
وبتردى على الأعراب!!!؟  
وليه نبض الحياة فيكى ..  
سراب ف سراب...؟؟؟  
دا أنا العاشق وعشقى عذاب


.....

أنا المجروح وترياقى  
ما بين الرمش والحاجب  
ولما اشتاق وتشتاقى

أتوه ف الوصف واتعجب  
ولما لمحت أحبابك  
جریت دوغری علی بابك  
لقتك ... بس یا خسارة  
خطوا ما بینا میت حاجب  
دا انا العاشق وعشقی عذاب

## مواطن مسکین...

مسکین وهمه تقیل  
محتاج لمیت رزقه  
تعبان وبخته قلیل  
وبیشقی علی رزقه  
شایل هموم الوطن  
وفاسه فوق کتفه  
خایف لیجری الزمن  
وف لحظه ینول حتفه  
ویموت من غیر تمن  
ویضیع کمان حقه



## مانيش قايل

مانيش قايل ... ف حبك تانى أى كلام  
ولا شاييل ... ف قلبى ليكى أى غرام  
وه تحايل ... عليكى ولآع الأيام ؟  
ومش طايل ... منك .. غير جراح والام  
وانا المايل ... بختوا حتى ف الأحلام  
دا يا ما قاسيت عشان خاطرک  
ويا ما عشت ف الأوهام  
وما بين النومه والقومه ... بكون وياكى وبشاطرك  
سعادتى بس ف الأحلام  
وحلم و بحلموا معاكى  
برغم الدوخه والتوهه  
أنا عمري ما راح اترك  
حقى ف يوم من الأيام




## واحد مشوش

واحد مشوش وعامل دماغ  
لجل ما ينسى اللي خان واللى باع  
ويهرب من الهموم والصداع  
دا ياما شد الحزام لما جاع  
وعاشق نومة الرصيف والضياع  
وكاره بطبعة سياسة الخداع  
ومركب بتمشى من غير شراع  
ودنيا ما تيجى غير بالدرع  
تايهة مشوش وعامل دماغ  
باع البتاعة عشان البتاع  
وضايح ما بين اللقا والوداع  
غاية دماغه وصارت مشاع

ونفسه يعرف حقيقة النزاع  
ومين اللى شارى ومين اللى باع  
ومين اللى ماسك خيوط البتاع  
وحاطط ماصيرنا بين كام صباع

## شعبيات

مسحنا لهم دموعهم  
والقلب اللى اشتراهم  
ولا عمره ف يوم ما بعهم  
وهما ياناس خانونا  
شرناهم وباعونا  
بكيينا ف يوم لوقاهم  
وضحكوا و ودعونا  
انا مش هزعل عليهم  
وها أدووس على حبي ليهم  
والضحكة اللى خدوها  
راجعة بالعند فيهم



## جوازه تفوت

انا نفسى اتجوز قبل ما اموت  
وجوازة تفوت ولا حد يموت  
واهى واحدة تبوز ليل ونهار  
وتطين عيشتى وابات محتار  
واتأنس بيها ف جنة ونار  
واهو من دا على دا اعيش مبسوط

.....

وتعالو احكيلكم ع المشوار  
انا كنت مسنكر قلبى تمام  
وماضى ب قلبى على الاقرار  
وماليش ف الحب ولا الاشعار  
وفجأة لقيت قدامى ملاك!!!  
ولقتنى وقعت ف بحر الشوق

.....

ياقلبي إعقل وكفاية هزار  
يا قلبي إعقل فكر وإختار  
قلبي ياقلبي الحب مرار  
قلبي يا مصنوع م البللور  
إسمع منى اخر إنذار؟؟؟  
قلبي يا عاشق بنت الحور  
طريق الحب ملان أخطار  
قالى خلاص أنا خدت قرار  
الحب الحب مفيش اعذار  
قلت خلاص سلمت ياقلبي  
قلبي معاك الحق ف حبك  
قلب حبيبي ملان أسرار  
اول نبض أحسة ف قلبي  
قلت خلاص أنا قلبي إختار  
دقت الشهد ف ايام حبي

وهى الاهد وهى الجار  
احلى وعود ف الدنيا اسمعها  
كل حياتنا ورود ازهار  
دا انا ه صنعلك دنيا جميلة  
وكل حياتنا عمار ف عمار  
ووعود تانية كتيرة كتيرة  
عمر ما تدخل بيتنا الحيرة  
حب ف حب ف حب ف حب ف حب  
عشت خيال ولا ف الاحلام  
أحلم عش حياتنا الهادية  
بس وجه مأذون حنتنا  
هيصة ولمة وذف وطار  
وصورة جميلة ف الاخبار  
أنا وعروستى الأيد ف الأيد  
تهمس ليا تقولى بحبك

ولهفة قلبى إليها تزيد  
تهمس كل حياتنا الجاية  
عسل وسعادة واجمل عيد  
.....

يوم والثانى إتغير حالها  
قوم يا حبيبي اليوم دا غسيل  
قلت ومالة ممكن اساعدك  
قالت لأ يا ابو دم ثقيل  
إنسى زمان وكلامى زمان  
دا انت وقعت خلاص يا عنيا  
يلا عشان تكويلى كمان  
إتذكرت عبارة قالتها .....  
هاسقيك شهد من الانهار  
بس يا حسرة الصدمة كبيرة  
طعم الشهد لقيتة مرار

ضغط وشخط مفيش أعمار

.....

شفت اللي انت عملتة ياقلبي

طلع همك ف الاشعار

مالنا ومال الحب ماكنا

عايشين نضحك ليل ونهار

لية بمشاعرك تستعبدنى

واحلى حياة عيشة الاحرار

قلت اتجوز وابنى حياتى

واشعر نبض الاستقرار

واللى جانيتة عذاب ف عذاب

غلب ف غلب ف غلب ف غلب

بقى دا ياقلبي هوا الجب

لأ دا الظلم من الاحباب

.....

وانت يايونس جوا الحوت  
جوا ظلام ف ظلام ف ظلام  
انت خرجت ازاي ماتقوللى  
قلبي إتهد مفيش اصرار  
وانتى عمايلك مالها غريبة  
دا انتى ف قلبى لسة حبيبة  
اعمل اية ودليلى احترار  
بس نصيحة ولازم اقولها  
ودا يا شباب منى انذار  
أى جوازة اخرها مرار

١٨-٥-١٩٩٣

(قبل الزواج ب ٣ سنوات)

## يا نهار ابيض

أمي .. احساس بالدفء ...  
يا لمسہ تدينى الامان  
ويا احلى معنى للوفاء...  
حضنك ييسقيني الحنان  
وقلبك يعلمنى الصفا  
واخلاصى ليكى م الايمان  
وذكريات ما تنسى  
لما بتصحى ع الادان  
اصحى يا ابنى للصلى  
واسعى وسمى بالرحمن  
واسمعلى منك دعوتين  
على كلمتين.. حلوين كمان  
وبس امشى خطوتين  
الاقينى برجعلك قوام

وارمينى فوق صدرك وانام

دا النوم على صدرك شفا

امى يامو الشعر الابيض

والايدين عالراس تططب

والعباية السمرا ديماً

ياما بتخبي ورها... وف الحنايا .

نبح صافى وقلب ابيض

امى لما كبرت حبة

ورحت اتشعبط واخبط

كت تقولى بنفس راضيه

يا نهار ابيض

يا نهار ابيض


امى يا مو الوجه أبيض

م الايمان بيشع نور

والطيايه تشر منه

والسعادة والسرور

امى ليه بيزيد جمالك  
كل ماتمر السنين  
تكبرى وتزيد امالك  
وتزيدى قلبى بالحنين  
يالى بنيتى بخصالك  
قلب فى حبك امين  
وكنت دعوة ف صلواتك  
تدعى وتقولى امين  
واما بنجح وتلاقينى ..  
تاخذنى لحظه م الغرور  
بتقوليلى بس حاسب  
دا الحكمة ميزان الامور  
وربنا على بابہ كاتب  
انه رحمن وغفور



## الى ابنتى ياسمين

مبروك نجاحك يا زهرة الياسمين  
شرحتى قلبى والدمع مالى العين  
والله ف سماه تتاقلى بالملايين  
دا انتى القمر حواليكى النجوم تايهين  
ياللى نورك ف السما ايه للضالين  
ما انتى منحة ربنا يحرسك م العين  
طب قوليلى هتبقى شاردة لمين؟  
واحنا يابوسى قايدين الشموع صفين



## يا ساكنه ف ضميرى

حابسك أنا ...

حابسك هنا ... جوا قفص صدرى

خايف عليكى من عيون غيرى

وبغزلك توب من نسيج شعرى

اتلف بيكى وأجمع شتات طبرى

وتكونى يوم اللقا دنيتى وقدرى

ماعنيكى بتحدد طريقى ومصيرى

ايامى وياكى هيا سنين عمرى

يامالكة فيا الروح وساكنة ف ضميرى

وانا اللى حبك اسرنى فاسمعى امرى

ارعى ف جنائين شوقى واتمتعى ب خيرى

\*\*\*\*

واما بعادك طال ونفد معاه صبرى  
ناديت ضميرى اللى جعلك للعاشقين قاضى  
بخاف عليكى من نفسى ومن غدري  
وانا ف حبك على كل الحالات راضى

\*\*\*\*

عرفتى ليه حبسك جوايا وبسيبك  
تجرى ف دمي وروحي الهايمة بتنادى  
واطلق سراح الشعر ف وريدك  
ينهال عليا الكلام يتهزله فؤادى  
وتجمعى حروفى و تقريها ف بريدك  
واتمد ف حدودك يا ارضى وبلادى

\*\*\*\*

و تشكلى قصيدة من حروف اسمى  
و ترسمى ملامح عشقى بعنادك  
وانا اللى صورتك بكلمتى ورسمى

ايه لكل الخلق ف وش حسادك  
يا روح بتسرى فى دمي وف جسمي  
حنى لعاشق ست الحسن بودادك

\*\*\*\*

دلوقتي خليني أكسر قيود اسرك  
ماضاق عليكى الحضن  
وماعادشى بيساعك ؟!!!  
وانا اللي خايف عليكى  
وخايف على كسرك !!!  
رغم انه نفس الحضن ...  
الشافى لاوجاعك !!!!!  
ليه باصة من فوق شرفة ..  
ف جدار قصرك ؟؟  
وهان عليكى الأمان ..  
وكان سهل إخضاعك

ليه تنسى كل اللي كان  
وبعيش على ذكرك  
وقلبي وسادة حنان ..  
تكفي لاشباعك !!!  
وكتتى كاس الامل ...  
مليانة حنية !!!!!!!  
ليه بعنى قلبي وغدرتى ..؟  
وهوا ما باعك !!!!!!!!!!!

نوفمبر ٢٠١٥

## بين قوسين...

لما تيجى تكتبى عن ذكرياتك..  
او تحاولى ترددى عنى حكاياتك..  
امسكى قلمك بايدك..  
بس حاسبى من اهاتك..  
واسرحى ف نبضة لوريدك  
واندمى وشوفى اللى فاتك  
لو هتضحكى عن شعورك  
وعن وجود اسمى ف حياتك  
لو سمحتى.....  
لما تيجى تكتبى اسمى ف سطورك  
حطى اسمى... بين قوسين (.....)  
وارسمى قلبك بقلمك..  
وامسكى قلبك بقسوة

وانسى ألم..ك... ما انتى قاسية  
واقسميه نصين  
وحطى قلبى جنب نصه..  
وارسميه زى البنات  
بس جنبه العين  
نازله منها الدمعه لامعه...  
ما انتى فاهمه .....

وانتى سامعه.. ان الدموع نوعين  
نوع مزيف زى حبك..  
دوغرى يجرى فوق حدودك..  
ما تقوليش نهرين..  
ونوع بيعصر فى القلوب..  
بس غالى .....

صعب جدا تلمحيه ف العين  
||||||||||||||||||||

ذكرياتك !!!!!

خدى عندك ادى ذكرى...

يومها كانت كالمزايده

كتنى جامعاهم لفكرة

كتنى عاملالهم مناقصة

مين هيدفع فيكى اكثر!!!

وكنت افكر.....

انتى ليه طمعك غريب

مانتى اهوه

وياكى قلبى

كنت انا ليكى الحبيب

وكنت اخبى.....

حيرتى فيكى

واقول ياربى

عايزه كل الدنيا ليها

وفوقها حبي  
عايزه مال قارون وملكه  
لأ وايه ع البيعة قلبي  
لأ ياقلبي  
اطرحيني م المناقصة  
مانتي ناقصة  
ويلا وبناقص ياقلبي....

## لغة العاشقين

من امتى صمتى يكون سكوت...  
اصل جوايا الكلام مين يسمعه  
الصمت مش معناته موت.....  
ولآ الكلام كان ع اللسان بيودعه  
يا جتت ومحطوطة ف تابوت  
تستنى ف طابور اللى جاى يشيعة  
بس مش كل الكلام اخرته موت  
لسه الكلام بيشكلوه فى مصنعه  
ولما يسرح خيال الصمت ف الملكوت  
ويهيم فى لحظة عشق جاية ترجعه  
تسمع بقلبك احلى كلمات السكوت  
وتلاقى عشقك للكلام بيودعه  
.....  
بس الحوار دا مالهوش صوت



## قلبي عندك

لَمَّا بسأل قلبي عنك  
عن سينيني وعمري عندك  
يرتجف ويقولى انك  
انتى جوا القلب نبضة  
وانتى تكوينة روابطة  
وانة ابدا مش ناسيكي  
واما بسأل ذكرياتى  
وافتكر فى العمر انك  
كل احلامى وحياتى  
والليالى الحلوة جانبك  
تحتوى عمري اللى فات  
بـ احضن الاشواق فى بعدك  
ولمَّا تكوينى الالهات  
ألقى نفسى مش ناسيكي

واسالى قلبى اللى سبتة  
من بداية العمر عندك  
واسالى قلبى اللى حبك  
ياللى عشت العمر اعاهدك  
نغلب الاشواق ونارها  
لما اقرب لحظة منك  
وارجع أسأل قلبى عنك  
والأمانى بين إيديكى  
وهوّا متلهف لقربك  
والحنان اللى ف عنيكى  
غمضى وضمى جفنك  
هـ تلاقينى رموش عنيكى

## انتى حبيبتى

إنتى السر اللي بيحيني  
إنتى الغنوه اللي بتشجيني  
إنتى حنيني  
وتعالى اقولك يا حبيبتي  
إنتى بدايتي وإنتى نهايتي  
وإنتى الظل اللي بيحميني  
وإنتى الخطوه اللي بخطيها  
وإنتى حكايتي وجاي احكيها  
اصل الخطوه اللي انا بامشيها  
خطوة لقلبي فى طريق حبك  
قلبي بيسال عمال ينده  
يجري ينادي يهاتي تقول  
انا حبيت؟؟ شئ مش معقول

مين يقدر ع الحب في قلبي  
غير رمشك همسك حسنك  
غير ضحكك ترن و ع لطول  
تخطف قلبي وف السما طيره  
طيب قولي... من غير قلبي

هاعيش إزاي

آه سر حياتي هو هواكي  
اصل القلب في حبك داب  
لقي طريقه بعد ما عاش  
في خداع كداب  
وبقلبي وقلبك ضيّع من دنيتنا  
خداع وعذاب  
م إنتي حكايتي اللي بغنيها  
وهرددها ليل ونهار

## قلبي الملهوف

عاوز اشوفك .. اقوي من كل الظروف  
عايز اشوفك .. برضوا وانتي بتخرجي  
من اي خوف

عاوز اقولك كلمه واحده

كلمة بيقلها الألف

قالها قلبي وهو لسه

بيعلموه .. نطق الحروف

ال ب بحبك حب

تخشاه الظروف

والح حبيب القلب

وانا غيرك ما اشوف

.....

شاورلي قلبك روحت اتوضا ..

واغسل همومك بمية الفضا

وابنى حصونك وبحبك اتصدى  
وانا وجنونك ف ربوعك اتمدى  
واسرى ف وريدك وبحبك اتحدى  
اتحدى كل الكون .. بهواك فين ما يكون  
وقصرك المسكون .. بالجن والمجنون  
والسحر ملو عيون .. وجمالك المكنون  
بعطرك اتندى

.....

وقلبى ظل يطوف  
ويتوه ف بحر الحب  
يحلم عيونه تشوف  
صورتك ف جوا القلب  
وبلهفة الملهوف  
بدعى واقول يارب  
بكرمك المعروف  
اجمعنى واللى بحب

## إلى الحبيبة

(انتي - اسمك - الشوق - جلب الحليوة)

١ - انتي

انتي احساس بس احسه

انتي جن وطالني مسه

انتي سرف قلبي دسه

جوايا من ايام زمان

انتي شئ ما عرفش وصفه

انتي نص وقلبي نصه

والكلام ف عنيكى نصه

واللحن والانغام كمان

٢ - اسمك ...

عشقت الدنيا ف عنيكى

عشان سموا الحنان باسمك

وتاه الحسن حواليكى

وراح اتدارى من حسنك  
ولو وصفوا الجمال بيكى  
يكون كل الجمال رسمك

### ٣ - الشوق

ارمي كل الشوق في حضني  
ومن عيون الناس تخدني  
جوا بحر الشوق وسبني  
انسي كل الدنيا بيك  
وانسي كل عذاب صادفني  
اصل كل الشوق عارفنى  
وخلي كل الناس تشوفني  
روحي ديما دايرة فيك  
ولما اقول انك واحشني  
مافي شيء في الكون يحوشني  
واما اشوفك اوتشوفني  
برمي نفسي بين ايديك

٤- جلب الحليوة

طجت على صدرها

وجلب الحليوة رهيف

والحسن من حسنها

بيطلب التخفيف

يا عيني على خصرها


وخصر الحليوة نحيف

غرجان انا ف حبها

وانا بجهل التجديف

والله على حبها

خلانى انام تخاطيف



## امشيلىك على رمشى

وتخذني لهفتي ليكي اناديكي

لكن صوتي مايطلعشي

وحاجه غريبه وخذاني

في وجداني

الاقى سكتك وامشي

ولو رجليا خذلوني

انا امشيلىك على رمشى

بحبك

واحلي شئ في قصتنا

ندوق المر نستطعم

عذاب وسهاد وشوق غلاب

سهر في عيون مابتنمشي

ومهما يكون انين وشجون

وكله يهون ماندمشي

بحبك

وغير قربك يا ساكنه ف قلبي

ماحلمشي

يا احلي لمحه في حياتي ف اوقاتي

واحلي ما ف آهاتي

ورب الكون بمقدرته

غيرك انت ما طلبشي

ومهما اقول عشان اوصف

قدرك عندي مقدرشي

## حنان

يا كتله م نبض وحنان  
حتى ف بعدك حنان..  
وبلمسة منك طبطبة  
على كتفى لما ازعل امان  
وبهمسة منك  
تمحى كل الام الزمان  
والقلب يرقص لما عيني بتلمحك  
ويطير كمان.....  
يا عبقرية ف المعانى ...  
والامانى ....  
يا شعر معقود ف اللسان  
احترت فيكى ... واحترار كمان..  
الشعر فيكى ...

ياللى ياما الشعر فيا..بيناديكى....  
ويحس بيا...ويناجينى ويناجيكي  
واغزل كلام الحب كله..  
بين إيديكى...

\*\*\*\*

حاسس بنبضك فى المكان  
حاسس خشوعك والأدان  
حاسس ربوعك..زرعت  
جنابين ورد ف البستان  
حاسك حنان!!!!  
شايك أمان!!!!

## بسيطة...

والبساطة قلب ابيض  
بس لو تسأل عليا دوغرى يفرح  
ولما بزعل كلمتين منك بسامح  
ولمسه منك ف الخيال يتوه ويسرح  
والحنان والحب على وشى ملامح  
خلى بالك اى شيء بسيط بيجرح  
والقلوب الطاهرة طائيرة بدون جوانح  
والبراح راكب حصان عمال بيرمح  
واما يجمعنا النصيب غلاب وجامح  
بتلاقينى لابسة طرحة وفتان ابيض  
مش بقولك قلبى ابيض  
يانهار ابيض  
يانهار ابيض



## فرحة

انا الفرحة اللي من جوا  
انا المحبوب.... انا هوا  
انا وياكى مش فارق  
مين الغالب... مين المغلوب  
انا بيكى بكون قوة  
وياما عشقت وارجع اتوب  
انا وياكى ميهمش..  
ايه المعدول.. ايه المقلوب  
انا فى الدنيا دى قدرك  
انا المكتوب  
انا شمسك انا قمرك  
والمكتوب... لا منوا هروب  
انا وياكى سلطانك..

انا جاهك .. انا مالك ..  
انا الحلم اللى تحلمى بيه  
انا يمكن اكون عادى  
لكنى اكيد ف أحلامك  
انا معاكى كما النسمه  
تهفف ع الخدود تناديه  
انا الميه انا المطره ...  
بتنزل ع الورود تسقيه  
انا سندك .. انا ولدك ..  
ف لحظة ما تعوزيه ..  
تلاقيه ...  
انا جايز اكون دمعته ..  
فى لحظة تفر من عينك  
وانا برضوا اكيد شمعته ..  
تنورك سواد ليلك ..

ومهما اسكت اكيد سامعه  
عيون قلبى تناديلك  
انا بيكى وابكيكى..  
واشواقى تناديكى  
ف سامحى بجد ارجوكى  
دا انا وعمري فدا عنيكى



## زفاف فوق السحاب

عاشق سمايا ودينتي وارضني

عاشق مواويل الحب والآهات

عاشق شروقك حبيتي ف ساعة الصبحيه

واشوف جمال ضحكتك في ضحكة الميه

وتخذني عيونك لبحر من الخطوات

خطوه توديني للسما الأولي

وفيه اشوفك ملاك طاهر ساكن السموات

والخطوه الثانيه

تنسيني ..... تتوهني

توديني لدنيا ثانيه كلها نفحات

والخطوه الثالثه

اغرق ف بحر النور

واسأل واقول يا اهل الهوي منين آتانا النور؟

يقولوا دا نور حبيبتك ودا بس جزء ضغير

والخطوه الرابعه

اشوف حاجه غريبه تحير

شفت القمر هناك مستخبي بعيد

سألته... قتلته يا قمر مالك حزين وشريد؟

قالي حبيبتك ياسيدي رجعتني وحيد

خرجت علي الكون نورت شئ غريب !! وجديد

انا كنت زمان مقصد العشاق

ودلوقتي قاعد لوحدي .. طريد !!

لا حبيب يقول فين القمر؟ ولا يفتكر مواعيد

شوف يا قمر..... قال القدر:

دا زمن هواك انكسر ومدام حبيبي ظهر

إجري واستخبي بعيد

والخطوه الخامسه

لقت حبيبي هناك

قالي تعالي يا قلبي اشغلك واهواك

قلت حبيبي اخيرا ها تنصف وألقاك

قالي تعالي نكمل الرحله وانا وياك

والخطوه الساته

انا وحبيبي بنتزف فوق السحاب

حبيبي لابس الطرحه وحولينا الاهل والاحباب

دا يوم المنى يا حبيبي والكل جاي يهني

وخرج القمر من مخبأه أصله جاي يغني

حالف يزفك علي ويشهد موكب الاحباب

ومعاه نجومه بترقص رقصه تخطف الالباب  
زفاف ملاك يا حبيبي والسما تفتحلنا الابواب

والخطوه السابعه

انتي حوريه م الجنه

أهداها اهل السما للقلب لما اتمني

خد عروستك وافرح بقي واتهنى

وانزل بقي للارض وابنوا عش جميل

ما بين رموشك تشيلها م انتا بجد أصيل

وإحنا هاناخذ قمرنا وشمسنا ويانا

دا نور حبيبتك كفايه ينور ارضنا وسمانا

١٩٩١/٣/٦

## الجنون

جربت مرة الاحساس بالجنان  
وهربت من طوق الروتين  
جربت طعم القسوة ممزوجة بحنان  
جربت مرة تنفجر بالضحك  
وانت من جواك حزين  
جربت طعم الخوف جوا احساس الامان  
عمرك حسيت القهر قاتلك  
ف الالم غرقان وتضحك  
واللى حوالياك فرحانين  
جربت تبقى العقل  
جوا فى عش المجانين  
يبقى دا هوا الجنون



## أيه انطباعك...؟

صدقيني....

ياللى قلبى كان رتاعك

مانتى ياما لعبتى بيه...

وهوا من جواه شارىكى

كنتى ياما تهددى بالبيع وهوا...

عمره ابدا يوم ماباعك !!!

قلبي ال طول عمره كان...

ياما يراعىكى ؟؟؟؟؟؟

رغم انه شاف منك وداق..

ألوان خداعك !!!!!!!!

صدقيني ...

قلبي كان لساته شارى

ياما كان يتمنى مرة...

يجيله إحساس ب انصياك  
طب وانا كده ليه هادارى  
حتى لو حب التملك....  
أو دا كان هوا انطباعك  
قلبي كان حبك حقيقى  
قلبي... عمره ف يوم ما باعك  
ويا ما هبت ريح عاتيه  
وكنت انا... مجداف شراعك.  
كنت الاقى معاكى نفسى  
كنت انا... براءة اختراعك  
وحتى كتالوج المحبة...  
شرحتهولك  
وف يوم غرورك....  
صور ان الكون بتاعك  
وانى لو حبيت اقف ...

علشان اطولك  
اجمع جبال الوهم...  
ويآ أدوات اصطناعك  
وفوق تلال كلام الحب..  
اللى ياما قولتتهولك  
يمكن ساعتها ...  
اقدر انول شرف استماعك  
كان فين غرورك...؟؟؟؟  
وانتى بتحطى و بثقه ..  
طبعا صوباعك  
تحت ضرسى...وكتتى فاكرة ان انا...  
برضوا لسه الواد بتاعك  
دلوقتى ...عيشى الوهم وحدك..  
دلوقتى...ه تعيشى ف ضياعك  
دإنا قلبى ياما صبر عليكى

دلوقتی ایه هوا انطباعك؟؟؟؟؟  
وانتی اهو شایفانی ماشی ...  
و القمر ف ایدی الیمین  
متأنججیین....  
بصی.. ف ادیها الشمال....  
الدبله والخاتم بتاعك.....!!!!!!!  
قولیلی ایه هوا انطباعك  
قولیلی ایه هوا انطباعك

۲۰۱۵ مایو

## من قلب كان بيحب

فاكرة وعدك آبله ليا  
ولا بت حنى لعوايدك  
فاكرة وانتي بين إيديا  
لما كان الشوق يغازلك  
فاكرة ولاّ ما إنتى فاكرة  
لما كان الحب ينطق  
فوق حدودك وف شفايفك  
لما كان قلبك بيرقص  
من فرحته لحظة لقايا  
فاكرة ليل البعد لما  
عذبك حير سنينك  
فاكرة لما كنتى تيجى  
وتقوللى قلبى عايزك  
كنت اقولك إنك انتى  
جوا قلبى الوحيدة اللي شاييفك

فاكرة لما كنت ببقى معاكى ديما  
عمر ما بخل المشاعر حط عندك  
فاكرة لما دموع عنىي...  
كت بتنزل زى سيل النهر لما  
كنت ببعده لحظة عنك

.....

خلفتى ليه وعدك لقلبي  
دا قلبي عمرة ما خان عهدك  
كنت بقضى الليل لوحدى  
بتمنى مرة لمس ايدك  
كنت اطوف وارجع بفكرى  
واعبر حدودى او حدودك  
ولما كان الشعر ينطق من عنىي  
من سكات  
من غير ما ينطق بية لسانى  
ولما كنتى تبقى انتى بين ايديا  
كان يضيع خوفى لبكرة يجى تانى

لما كانت نظرة واحدة  
تمحى كل الحزن اللى  
رسبة فى قلبى زمانى  
فاكرة لما كان حنانك  
يسبقك يحضن سنينى  
يجرى ويقولى تعالى  
دا الحنان ف الكون عشانك  
فاكرة ولاّ ...

افكرك بالحب تانى  
كلمتين قولتيهم انتى  
لما كان قلبى وقلبك ف الصفا  
وقت اللقا

قولتى انى روحك اللى عايشة بيها  
قولتى انك اتخلقتى علشانى  
فاكرة ولاّ افكرك بالحب تانى

.....

فاكرة لما غربتك ف الحب كان  
يعوضك عنها حنانى  
فاكرة وعدك ابلة ليا  
ولا بت حنى لعوايدك  
لما كانت احلى كلمة  
قالها قلبى ف يوم لقلبك  
قالها ليكى بكل همسة من مشاعرة  
قال بحبك قالها عايزك

.....

فاكرة ولا افكرك بليالى غدرك  
دلوقتى قلبى راجع يقولها بكل قوة  
مفتكرش انى عايزك  
مفتكرش انى عايزك

١٩٩٢/٣/٩

## إِجَار قَدِيم

ساكن ف قلبك .. بايجار قديم  
ومشاعرى تجاهك .. عاملة رجيم  
عاوزك تكونى .. نسمة جميلة  
وتكونى بحسبك .. احلى الحریم  
لو تنفضى غبار السنين  
وهواكى يرجع زى النسيم  
ونسى الهموم والسنين والروتين  
ونرجع شبابنا وهوانا القديم  
تحركنا كلمة ونظرة ولمسة  
وتهد كل الركود اللئيم

\*\*\*

بس الغريبة قلبك عاهدنى  
زمان ان حبى هيفضل عظيم  
ولما اضمك فى لحظة لحضنى

تفتحى نفسى وانسى الرجيم  
وان يوم حصل وقلبك عاندى  
راح استعيذ من الشيطان الرجيم  
وتضيع المقاسى وكل الهموم  
ونرجع بحب وقلب سليم  
واحسن بحنانك وافوز بجمالك  
دا قلبك حنين وقلبي رحيم

\*\*\*

واكون ملك قلبك واحلف بربك  
انى بحبك والله العظيم  
مش ساكن فى قلبك  
بايجار قديم  
ومشاعرى خلاص  
مش هتعمل رجيم

## القدس

نفسى ازور القدس  
واحضن شعاع الشمس  
واتمشى فى الخليل  
واسمع بصوت الهمس  
ايات من الترتيل  
مع الكليم والمسيح  
ونبينا احمد والخليل  
واجري فى رام الله  
واشوف الجنة فى جنين  
واقابل صلاح الدين  
وادهس كلاب شمشون  
واحررك يا قدس

وتطرح الحرية  
من الشجر ذرية  
ولا حوجة للاحجار

# أوجاع مواطن مهموم

(احترت - الف لئه)

١- احترت

احترت واحترار دليلي

يابلد وقلت ال اه

ونهارى صار مثل ليلي

بلع الامل جواه

صابر على مر الزمن

ولامتى يا ولداه

ها عيش اسير جوا المحن

ميت ف شكل حياة

٢- الف لئه

خذتوا حياتى ولا إعرضت...

ولا قلت لئه !!؟؟

والفقر ياما جزاً فيا

مش لاقى طقه !!

اربع حيطان.. اتدارى فيهم

ولا قلت شقه!!!!

ان شالله خص

اتاوى فيه...!!!

مش ناقصة خنقه

ولا للاهانه.. والمهانته؟؟

وبجد حقه...

لحد الكرامه :

بقولها لئه والف لئه

## هى دى مصر

- شفت ياعم الحج بلدنا دى ماشية ازى  
زى حياتنا اهى ماهى ماشية  
منين من فين وبكام ؟؟؟؟  
بلا تخطيط بلا احلام بلا نظرة لقدام  
زى ما هى هتفضل ديما !؟..  
والحال زى ما هو اهي فضل هوا الحال !!  
شوية فوق والباقي تحت  
مش هنفوق من هم وقحط  
بين الغلا واكل السحت  
والشبعان ديما شبعان  
وباقية كل الشعب جعان  
رشوة وكوسة بلد منحوسة  
واللى ف بالك تحسبة موسى  
عدى وفاق فرعون بزمان

شفت ياعم الحج بلدنا دى ماشية ازاي  
 اوعى تقوللى ان ضميرى الحى  
 جعلنى وسط الناس انسان  
 ولا مشاعر الخير جواية  
 ممكن تمحيلى الاحزان  
 ولا شاطرتى ولا مهارتى هى سبيلى  
 عشان ما افوز بمكان  
 ظهرك مين وبتعرف مين وهدفع كام  
 هوا يا خلق داهو دستورنا  
 تسرق تعالى لفوق وتعشش  
 وتقعده وسط الصفوة تحشش  
 تنهب تلهف ولا تنتش  
 كلة مباح و كلة تمام

• شفت يا عم الحج بلدنا دى ماشية ازاي  
 ليه يابلدنا اتغير حالك  
 ليه يا بلدنا اية اللى جراك

ليه الظلم شابط ف مسارك  
ليه الضلمة بقت ف نهارك  
ظلم ويأس صاروا شعارك  
ليه تسقيننا شهد مرارك  
وتخلينا نكره دارك  
وبتكويننا ليه كده نارك  
ليه بتحطى النار فى ايدينا  
ليه من غدرك بتخلينا  
نكره ايامنا وليالينا  
بتشيلى ليه وتحطى علينا  
داحنا شعوب حافية وجعانة  
ولاكلابك ليه سمرانا  
هبش وهبشوا  
ارض ونهبوا  
خيرك كله رايح ليهم  
وانتى يامصر تدللى فيهم

● شفت ياعم الحج بلدنا دى ماشية ازاي

ماشية كام خطوة ل قدام

وبترجع مليون للخلف

عاش فيها بس يادوب

يجى ربع الواحد م الالف

شفت بلدنا ديما قاسية

زانقة الكل ف خانة اليك

اي تعامل اي مصالح

خد بالك طبعا تتشك

تدفع .. ه تلاقى مصالح تتصالح

والدنيا عقدها تتفك

● شفت ياعم الحج بلدنا دى ماشية ازاي

عمولات عمارات او عربيات ويسموها الشاى

او زلموكة او نقدية او م الاخر تبقى هدية

والعملية ترسى عليهم والموضوع بقى كله تمام

وشوف دلوقتى يا عم المصرى بيساوى كام؟؟

● شفت يا عم الحج بلدنا دى ماشية ازاي

ماشية بتمخطر ع الواحدة

وتمسك لينا كدة ع الواحدة

وتدى لغيرنا ف ايدة لجام

ايام الجاهلية كت ارحم

من ايام مفيهاش اسلام

ناس ف الدولة أشخاص هايلة

الرسمى مليون ف الشهر

وناس مطحونة م الجوع مجنونة

بتموت يوميا م القهر

قهر وظلم وجوع دا مفيش ولا حتى رغيـف

ماحدث قاللك يابن ال...إيه تعمل فيها شريف

آدى حرامى أهوه قدامى عامل فيها ولد وخفيف

مين ها يحاسب حد يا عالم ف بلدنا ويكون مسنود

مين هيوقف بطش وزير ولا طمع كده مالوا حدود

مين ف بلدنا يقدر ينطق يصبح يبقى غدا للدود

ولا أراضى ولا قصور دخلت فـ الجيب المسحور  
واللى يلف واللى يدور بيكون كالبدر المشهود  
واللى ضميره حى يا عالم واللى يراعى ربه يا عالم  
يلقى طريقه كده مسدود !!!!!!!!!!!!!!!  
واللى خانقنى ليه الناس كدا راضية وساكته  
امتى يا شعب يا صامت تنطق  
امتى هتنطق يا ابو الهول  
امتى هيجى يوم وتقول  
مرة فيوم قول كلمة حق  
امتى تقول للظلم دا لأ

أكتوبر ٢٠١٠ (من مقدمات الثورة)

## أزمة تفوت

توت... توت... توت  
صوت القطر اللي معدي  
وييجري يفوت  
بين كل محطة ومحطة  
فيه بلاد بتفوت  
وولادع الأرض بترمي  
عايشة بتموت  
ف تراب الفقر بتمرغ  
م الجوع هتموت  
وصراخ نسوان  
م الجوع سهران  
ترقع ميت صوت  
والدنيا سكوت  
فاكرين القطر اللي معدي

الحل معاه  
أل إيه فاكرين إنه يهدى  
ويجيب وياه  
مسئول..ويا عصاه السحرى  
الحل المظبوط  
بس خسارة وألف خسارة  
القطر يفوت  
ويمر كمان على ناس تانية  
واقفة ف طوابير  
وحكومة أصحابنا البعدة  
لابسة الطرايطير  
ومفيش مانع وقت الأزمة  
بتكون صراصير  
تجرى وتهرب وبدون لازمة  
أو حتى تطير  
والناس تحلم..

هوا صحيح إن الأعمى

يرتد بصير

والناس م الغلب بقت واقفة

وبتنام طوابير

وحياتنا كمان ملهاش معنى

ومشاكلنا كتييييييييير

ومصيرنا كمان عاوز وقفة

ومحتاج تفسير

والشعب بيجرى ورا القمة

ومحتاج تغيير

والناس بقى من كتر جراحها

عاشقة التخدير

والجو كمان بقى غير صحى

وهاتك تحذير

والدنيا أهو اتلخبط حالها

بزعايب أمشير

زعابيب أمشير أمطار طوبة  
وأحوال الدنيا المقلوبة  
وأغاني لمصر ولعروبة  
والناس فى الشارع مصلوبة  
طوابير طوابير  
الكل بيطلب أنبوبة  
وياخوفى لتطلع مضروبة  
وملايين الناس هنا مكتوبة  
ف كل حياتها بالطباشير  
والشاطر ياخذ أنبونة  
مرة وساعتها تقول توبة  
وتلاقى إرادتك مسلوبة  
ودُغرى تروح تلبس طرطور  
وحكومة تمصمص شفايفها  
وكان محدش هيشوفها  
لو حب كبيرها ينصفها

ببشاورة هـ يمسح الطباشير  
والناس فى المشية بتتكفى  
وكانها ماشية على الحافة  
من خوفها كأنها تتخفى  
ناقصها يا دوب جناحين وتطير

.....

توت .. توت .. توت  
صوت القطر اللى معدى  
وبيجرى يفوت  
فية ناس بتكوش ع الدنيا  
وناس معهاش السحتوت  
وناس محكومة بلقمة عيش  
وحاكمها التوت والنبوت  
وفية ناس الهدمة تجيبها منين  
بتغطى ولادها بورق التوت؟

.....

مصر

مصر يا غالية يا أصيلة

إيه الموضوع

ليه ابنك يا مصر يا عايقة

هيموت م الجوع

ليه ابنك بيضيع حتى

حقة المشروع

ليه حتى لو نام وفحضنك

بيقوم مفزوع

راح فين الخير يا اللي براحك

كان يملى ربوع

راح فين النور يا اللي ضياءك

كان بحر شموع

راح فين الحب اللي بنالك

ف القلب قلع

راح فين العدل ف محرابك

بكاني دموع

طب فين العزة اللي بترفض  
الذل خضوع

.....

توت..توت..توت

صوت القطر اللي معدى

ويجى يفوت

مصر

مصر ياغالية يا أبية

يا بنت بنوت

مصر يا فاهمة يا ذكية

ليه صوتى سكوت

أنا إمتى هتظهرلى كرامة

وانا ف التابوت

وانا كنت العملاق ف رحابك

وبقيت مسخوط

راح فين السحر اللي يجنن

كل العشاق

راح فين الدفاء اللى يصحى

الشوق والأشواق

راح فين الحب اللى يحنن

حتى النبوت

يا مصر

إحنا ف خيرك نجرى

ونبنى بيوت

يا مصر

احمينا من البعدا

لاحسن هنموت

توت..توت..توت

صوت القطر اللى بيجرى

ويعدى يفوت

## أوجاع المطحونين

اللى عاش العز فيكى مش أنا  
واللى داق المر فيكى هو أنا  
واللى شاف الظلم منك برضو أنا  
واللى عمره ما شاف معاكى يوم هَنا  
برضوا أنا ...أيوه أنا  
وبعد طول العمر عشته تحت أمرك  
عشت فيه أيام قليلة هى مهرك....  
إحسيها هتلاقيها مستحيل تكمل سنة  
دا اللى داق المر فيكى هو أنا

\*\*\*\*

كان مثل شعبي قديم امشى يا بنى كام سنة  
لف واتعب مهما تتعب بس لا تعدى قنا !!  
رضعوننا الجبن واحنا صغار غصب عنا !!

علمونا الخوف يعيش جوا لحظات حلمنا  
الجماد مـ السهل ينطق، واحنا نكتم رأينا !!  
علمونا المشى جنب الحيط نخاف من ظلنا  
قصدي جوا الحيط لادياها تنهش لحمنا !!

\*\*\*\*

وبرغم ذلك :

عشقت كل مافيكي حتى ففرك...؟؟؟؟!!!!!!  
وعشت جهلك ..وطالني مرضك وبطش اهلك  
وعرفت انك انتي وغناكي ومنتهاكي مش لنا  
حتى الاغاني والاماني والكلام الحلو برضوا مش  
لنا

لينا الصراخ مكتوم كمان جوا الضمير مليون بكاء  
لينا السؤال من غير جواب ومين بكى ومين اشتكى؟  
لينا التعب والبهذلة وعيشة صعبة مقنذلة  
وناس كتير قوى منناكل حياتها مؤجلة

من مرحلة الى مرحلة ويمكن تنام من غير عشا  
وناس تتاجر ف السعادة الصفوة واهل الريادة

واكلنها والعه بالهنا !!!!!!!!!!!!!

وخيرك مغرق صنفهم والكل طالب ودهم

والعز فيكى السلطنة ؟؟؟؟؟!!!!!!!!!!!!

واحنا الغلابة المقهورين

ع الارض منا مرميين متغطين بجلدنا

\*\*\*\*\*

ولما ثارع الظلم شعبك

والحق يومها كان مواعدك

شدينا حيلنا ووهبنا روحنا نولنا الارادة بعزنا

وهوانا كان حرية نضفنا من جوا ونضف قلبنا

يومها فرحنا ولاقينا روحنا ساجدة قلوبنا لربنا

وبعدها يوم بعد يوم متهاات

كثير حورات كثير لمت بنا

تهنا وتاه منا الطريق  
بالشوشرة والنقورة والمسخرة  
وبدل مانجرى للامام ..رجعنا ميت خطوة لورا  
وحد يجرى يشتغلنا وغيره جاى للسمسرة  
ونلف جواف دايره من جواف الدواير و المتاهة  
مُحيرة  
ورجعنا نحلم بالخلاص  
بس امتى ياتري؟؟؟

## بالدموع والخوف

بالدموع والخوف ...

كتبت اسمك يا حبيبتى حروف

وقلبي كان ملهوف

رصيت جثث شهدائك

يا حبيبتى صفوف

تاقت فيكى الأسمى

وكبرت بيكى الامانى

بالحسنى والمعروف

واتوحدت فيكى

كل الوجوه البريئة

دا العادى والمألوف

رخيصة يا أروحنا

و مش مهم جراحنا  
بس الحقیقة  
كسرنا قيود الخوف

يناير ٢٠١١

## بجك يا مصر

بجك يا مصر وف القلب ساكن  
جك يا مصر ف كل الأماكن  
بجك يا مصر بجك ولكن  
لكن ولكن ميت ألف لكن

\*\*\*

مألمانى يا مصر كثير  
وألمك فالقلوب مسامير  
وانا اللى حبى ليكى كبير  
وجك دا ولا الأساطير  
وبحلم لو في يوم جانا  
خيرك لينا بالقناطير  
بالعدل لكل أولادك  
ومتفرقشى وزير وغفير



## ثورة يناير

بـ صلى لربنا وادعى  
تخطى الأزمة وتعدي  
يا مصر انا فدا ترابك  
واضحى بأغلى ما عندي  
واشيل روحى على كفى  
ودمى ورد فى ثيابك

\* \* \*

أخيرا بان لى فيكى طريق  
لقيت شطك وكنت غريق  
وانا اللى عمرى فى رحابك  
مادقتش فيكى بلة ريق  
ولاً مرة لقيت لى صديق  
وما كتتش يوم من أصحابك

\* \* \*

دا خلوا الظلم عنوانك  
وعمرى فات فاخزانك  
وبين القهر والتلطيش  
جيت اطلب وڈ قالوا مفيش  
دا نهبوا يا مصر ثرواتك  
وطمعوا حتى ف البقشيش

\*\*\*

ورحت ابص قدامى  
وافتش ع الأمان فيكى  
لقتهم سرقوا أحلامى  
وحجروا على وعليكى  
كبوس بيزيد فى أحزانى  
وانده ع الأمل مايجيش  
وانا المصري صميم وبسيط

حياتي كلها تقسيط  
وما بين اليأس والتشيت  
بناور يمكن اقدر اعيش

\* \* \*

وانا اللي شارى مرضاتك  
يوماتي أحكى ف كرماتك  
وبقنع نفسى بالتخدير  
دا كل الخير على بابك  
وعندنا علما للتصدير  
كتبنا كتير وقولنا كتير  
وياما نادينا بالتغيير  
وانا اللي عشقى ليكى كبير  
وكنت أعمى وصرت بصير  
وياما نادينا بالتحير  
نحرر نفسنا م الخوف

نفتّح لجلل يوم ما نشوف  
حقوق ضاعت بدون تبرير

\* \* \*

يا مصر يا ثورة الثوار  
خلاصك بالحديد والنار  
وابنك صار من الأحرار  
وبعد الضلّمة جانا نهار  
ما ضاعش العمر فيكى هباء  
ماعدش يحتوينا غباء  
بحبك م الألف للياء  
يا مصر بحق كل شهيد  
لأخلى بكره بيغى العيد  
ولازم يوم شموعى تقيد  
ويكبر فينا حلم وليد  
ونتنفس بحرية

فبراير ٢٠١١

## نكته سخيفة

ليه النكتة بقينا نشوفها حاجة سخيفة  
وكل الهم اللي على كتافنا وشعبك صابر  
ولا العيشة وكل ما فيها دي حاجة مخيفه  
رغم الظلم بيملى حياتنا عذاب ونكاب  
وما يشغلنا إلا اللقمة ناكلها شريفة  
تاهت الدنيا من حواليا ماعدتش خابر  
اتخن واحد كان يتمنى هدمه نظيفة  
وجيبه مافيه غير كام ملطوش على كام تعريفه  
وف ايامنا الخطبا كتير واهوياما منابر  
ضحكوا علينا وقالوا وحوشها بجد أليفه  
وجيت ع الدنيا وزى ماجيت ومشيت وانا عابر  
وعشت حياتي ف بلد النكتة (نكته سخيفه)  
(بعد خمس سنوات من الثورة)



## حالك يابلدی

لما انا وانت ب نُحبط  
مین یشد ف ازر مین  
واما حالنا یسوء ونسقط  
مین یواسی التانی مین  
واما حال الناس یغمک  
وماتلاقیش فیها الامین  
واما طبع الخلق یخنق  
ولا حال المسؤلین؟؟؟؟  
واما ادب الناس بیفلت  
ویبقى اسفل سافلین !!  
واما معظمهم ه یشحت  
والاعزة قلیلین...!!!!  
والشوارع حاجة تقرف

بالتلوٲ شبعانين؟؟؟؟  
هوا دا حالك يا بلدى!!!  
يا عيون المشتاقين!!!  
ضعت فيكى ومش لوحدى  
متبهدين عبر السنين

## محدثش فيكوا ينكشني

أبوس إيدكم ..!!  
محدثش فيكوا...ينكشني ...  
ولو حتى.. فلت مني الكلام  
لازم حد يلحقني .. يكتفني ...  
ويكتم بقي .. ويحوشني  
ولا تقولي كلام فاضي ...  
ولا ثورة... ولا دياولوا  
ولا أحكام... ولا قاضي  
ماهياش ناقصة تاني كلام  
مدام الكل كدا راضي  
يعيش ميت.. سنين قدام !!!  
ومن كتر الهنا.. قصادي  
على القهوة.. ماسك شيشه  
وصوت الست ... ييلعلع....  
يقول يا سلام .....!!!!

وفيلم وفن؟؟؟ متشخلع ....  
ورقصة لصابى.... وبترفع!!!!!!!  
ولا تقولى.. ف جيبك كام؟؟  
صحيح بالحق.. يا بلادى :  
عاش بالدين.. ومتقاضى !!  
ومن كتر الهموم ما بنام!!  
وليه زعلان؟؟؟؟؟؟  
أبوها راضى.. وأنا راضى  
واهى سنين ضايعة.. ع الفاضى  
ماهو بناقصها دى الأيام  
وليه قهران؟؟؟؟؟؟؟؟  
يا عم استنى.. واسمعنى!!!!  
حزين ...  
ع اللى انقتل ف ميدان  
حزين ...  
ع اللى جرى وباعنى  
حزين ..

على انسحل واتهان  
وع الحلم اللي يوجعنى  
وانى اعيش فيها... انسان؟؟!!  
ولما الحلم يجمعنى  
انا وجرجس .. وكنا جيران  
وكان بيشلنى .. يرفعنى  
ماسك ف ايديا بالقرآن  
ولما رصاص الأمان ليهم  
فرش...

فى صدورنا ونام  
مافرقنيش أنا محمود ...  
ولا جرجس .. ولا باكينام  
وتتكرر تانى القصة  
وهى ديت السلطة  
كما الجبروت ... ف كل زمان  
وتتلون حياتنا كمان؟؟  
بلون موتنا ... بلون الدم؟؟؟

وحلم كابوس... ملان بالهم  
وكذبة كبيرة... بنعشها...!!!  
وعشناها... وكان يا ما كان!!!  
ولما رصاصكم... برئ منى  
ومن دمي.. قولوا لامي  
انى كنت عييط؟؟؟  
وصدقت الامل نوبة  
بقولها أهوه... خلاص توبه  
مانيش ها حلم... هاعيش و خلاص  
لحد ما يبقى فيها... خلاص  
ولا تقولى هنرفع راس  
ولا مصرى... ولا مهياص  
وحتى دراعى مش نافع...  
لضرب الفاس  
من كتر مانضرب فيها؟؟؟  
من الحراس  
ولا قادر على خط الكلام بيها ..

على الكراس  
ولما امنكم طالني !!!  
وكسر لحمى ف عضامى...؟؟؟  
وطاطا الراس  
وخلى عدلكم يدبح !!؟؟  
قلوب الناس ...  
وكان الضرب ف المليون ...  
وناس تنداس  
ماطلعوا براءة يا اخونا؟؟؟؟؟؟؟؟؟؟  
ولا تقدر تهد نظام  
ماهياش ناقصة تانى كلام ؟؟؟؟؟؟؟؟؟؟؟  
نظام متربى متمكن ... ف سابع ارض ..  
ومخاوى شيطان خناس  
يروح يضرب .. بسيف العدل؟؟؟  
يسجن ناس ..!! وיעدم ناس !!  
ما كل حكاية ..عايزة مقاس

ماهياش ناقصة تانى كلام....؟؟؟؟؟؟؟؟

طب والورد..

اللى كان فتح فى جنين مصر

قطفوا عيدانوا...

واندفنوا ف جنب القصر

وكل القصة ما تطول...

نملى بالورود بستان

سوى جندى..!! سوى ثورى ..!!

مماتوا خلاص

وقالوا ايه اللى قاتلهم

قالوا دا الشوك ...

اللى بيزرع ف غصن الورد

محدث فينا... موت حد !!!

دى كانت لعبة ???

صد ورد؟؟؟؟؟؟؟؟؟؟؟؟؟؟

واصحابنا اللى عارفنا..

وعارفينهم

بإشارة واحدة من ايدهم...

نقوم على بعض !!!!

نموت بعض ؟؟؟؟

وويبقى يا سادة دا عيدهم و يوم السعد ..!!

ويحتفلوا ويرفعوا علمك مع الرايات؟؟

وف السهرايه والرقصة على الصاجات

لقت علمك حزام ع الخصر ؟؟؟؟

يا الف خسارة وخسارة...

بجد يامصر!!!!

وكان ياما كان

ف مرة زمان ...

كانت قصة مشهورة للسحرة مع الفرعون

عشان الحق ما يظهر لابد يكون

تفوق الخلق م الغفلة

وغشاوة تزوول

ولما قامت الحفلة

حضر فرعون وكان السحر وياهم

وكان الكاهن الاعظم هنا معاهم  
وكان الجمع م الضالين  
ولما السحرة جت ترمى  
حبالها اتحولت تعابين  
لفت لفت ...  
على رقاب الكل واتشدت  
خصوصا اللي مش ساجدين  
والمساكين كانوا شايفين  
بس السحرة شداهم ... شمال ويمين  
كانوا تايهين ... كانوا طائعين  
ولاله الصنم هتفوا ... وسجدوا كمان ...  
مع الساجدين ؟؟؟  
ماهيش محتاجة تانى كلام  
كلام يمكن ...  
يخيل على ناس  
وناس ..

عاملة انوا يقنعها

وناس..

ف الحق دول انجاس

وناس ..

عايشالنا بقناعها

وناس ..

تلبس قناع الغش

بغباوة !!!!!!!!!!!!!

ولافاهمة ولا عارفة

ولكن ..!!

عايشة بحفاوة ؟؟؟

وتتغطى : بسقف الوهم

وتتفسر: ف مليون حلم

وياريت الحلم دا ... مشروع

عشان خاطر الغلابة... تعيش

واهي عايشة.. ف بحر خشوع

ولا حاسة.. بآلام الجوع

وتسأل.. اى حاجة مفيش  
واتفرج على الساجدين ...  
تحت الاناء مستنين  
بركة مولانا الملك !!..  
تنزل نقط  
يتوضوا بيها ..!! فى الملاء ???  
وتملى بعنيها الدموع  
تنفعها فى .. وقت الكلاء  
والحل .. عند اللئ خلق  
اما انا .... مافيهاش رجوع  
طب اسمع منى كلمة اخيرة  
تعيش سلطان... باقى الايام  
ماهيش محتاجة... حتى علام  
بجرة من قلم واحدة  
واشطب ليك ...يجى كام عام  
ولا ثورة... ولا دياولوا  
ولا تثوروا.... ولا تحاولوا

وتلقى الدنيا ماشية تمام  
ماهيش محتاجة تانى كلام  
ابوس ايدكم...  
محدث فيكوا ينكشنى  
ماهيش محتاجة تانى كلام

٢٠١٥/٥/٢١



## رمضانيات

(بشاير الخير - تبت إليك - يا رب)

١- بشاير الخير

هلت بشاير الخير علينا  
وعملوا أهل الخير مزاد  
والموائد اتجهزت ...  
والخير مرطرط ف البلاد  
حسيت بريحة الجنة هله  
والتقوى دبت ف العباد  
رمضان له سحر وعنده طله  
بشوفها ف عيون الولاد

٢- تبت إليك

بكت عيني على اللي راح  
وناح قلبي وبكاني !!!!

ونفسي لو يجيني صباح  
من غير ما يروح حبيب تانى  
وانا قلبى ملانى جراح  
وخذتنى الدنيا لهياني  
وانا امتى بقى هارتاح  
وامتى الحزن ينسانى  
وكل يوم بنعى حبيب  
ومين يا دنيا ينعانى  
بتوب إليك قلبى يطيب  
وف بعدى القلب بيعانى  
وانا عبدك ملانى الشيب  
بـ اعصى واتوب من تانى  
تبت إليك يا خير طيب  
وكل الدنيا سمعانى

٣- يا رب ...

بلجأ إليك يا رب ...

رافع كفوفى لفوق

بدعى يجينى الفجر

ويطلع عليا شروق

ومهما طال العمر

قلبي ماليه الشوق

واكفينى شر الغدر

والحوجة للمخلوق

والهمنى ربي الصبر

دانا إليك محقوق

|||||

بلجأ إليك يا رب

وانا اللى عبد ضعيف

اشملنى فى رحمتك

بذنوبى أنا مكسوف

واشفينى بقدرتك

دانا إليك ملهوف  
يا رب دى حكمتك  
علمتنى بحروف  
يا رب أنا صنعتك  
عبدك بقلبه يشوف  
طمعان أنا فى جنتك  
واكتبلى أحج واطوف

## المحتوى

٧	أحلام غربية
١٥	التعلب فات
١٧	متاهة
١٩	عابر سبيل
٢٣	أيوة انا فلاح
٢٧	عشان بسكت
٣١	تاريخ منسى
٣٥	إلى الكلمة
٣٧	للزمن بصمات
٣٩	أنا العاشق
٤١	مواطن مسكين
٤٣	مانيش قايل
٤٥	واحد مشوش
٤٧	شعبيات
٤٩	جوازة تفوت
٥٥	ياأفمار ابيض
٥٩	إلى ابنتى ياسمين
٦١	ساكنة ف ضميرى
٦٥	بين قوسين
٦٩	لغة العاشقين
٧١	قلبى عندك
٧٣	إنتى حبيبتى
٧٥	قلبى الملهوف

- ٧٧..... إلى الحبيبة ( إنتى - اسمك - الشوق - جلب الحلوية)
- ٨١..... أمشيلك على رمشى
- ٨٣..... حنان
- ٨٥..... بسيطة
- ٨٧..... فرحة
- ٩١..... زفاف فوق السحاب
- ٩٥..... الجنون
- ٩٧..... إيه انطباعك
- ١٠١..... من قلب كان يبحب
- ١٠٥..... إيجار قديم
- ١٠٧..... القدس
- ١٠٩..... أوجاع مواطن مهموم (احترت - أُلّف لئه)
- ١١١..... هي دى مصر
- ١١٧..... أزمة تفوت
- ١٢٥..... أوجاع المطحونين
- ١٢٩..... بالدموع والخوف
- ١٣١..... مجبك يا مصر
- ١٣٣..... ثورة يناير
- ١٣٧..... نكتة سخيفة
- ١٣٩..... حالك يا بلدى
- ١٤١..... محدش فيكوا ينكشنى
- ١٥٣..... رمضانيات (بشاير - تُبِت إليك - يا رب)



